



Հուսիկ Արա

Ձայն է գալիս

Քո մոտիկը հիմա շատ է հեռու .
ես գնում եմ ինձնից ու չեմ հասնում քեզ:

Կեսգիշերի այն կողմից
գալիս է ձայնը էլի՝
իմը չես լինի երբեք...
ու ժամանակը քեզնից հեռո է:

Քեզ սիրելի նորից,
հոգ տանելի քո մասին,
թևերիս մեջ պինդ գրկելի սիրուն մարմինդ՝
պահելի հեռու էս գեշ ու անդուր աշխարհից:
Հետո կրակ կտրած
խառնելի խոպոպների խուճուճ-խուճուճ,
հոգիդ հանելի՝ ցույց տալով լեզու,
անհասկացող ու դեռահաս պատանու պես:

Մինչդեռ կեսգիշերից այս կողմ
գալիս է ձայնը քո մոտիկից՝
իմը չես լինի,
որ սև թելի նման
սրտիս միջով անցնի՝
իրագործվող մահապատիժ:

Ափս սեղմում է բաժակը դիպված,
որ քեզնով սովորական է արդեն.
ագռավների սևն է պատուհանի մեջ՝
երամ-երամ.

խուճապ են ու ցրիվ մոլորվելուց առաջ,
իսկ երկինքը խարխափում ու վստահ չէ:

Քո մոտիկը հիմա
համացանցում թափառող մի լուսանկար,
որ վրիպում է հայացքիս մեջ:

Ագռավների սևի հետ ես կմտնեմ դժոխք՝ երամ-երամ,
թե իմանամ քո հեռուն կդառնա մոտիկ վերջին անգամ: